

# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

## Ո Ր Ո Շ ՈՒ Մ

N -Ն

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ՄԱՍՆԱԳԻՏԱԿԱՆ ԿՐԹԱԿԱՆ ԾՐԱԳՐԵՐ ԻՐԱԿԱՆԱՑՆՈՂ ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆՆԵՐԻ ԵՎ ԴՐԱՆՑ ՄԱՍՆԱԳԻՏՈՒԹՅՈՒՆՆԵՐԻ ՊԵՏԱԿԱՆ ՀԱՎԱՏԱՐՄԱԳՐՄԱՆ ԿԱՐԳԸ ՀԱՍՏԱՏԵԼՈՒ ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2000 ԹՎԱԿԱՆԻ ՀՈՒԼԻՍԻ 7-Ի N 372 ՈՐՈՇՈՒՄՆ ՈՒԺԸ ԿՈՐՑՐԱԾ ՃԱՆԱԶԵԼՈՒ ՄԱՍԻՆ

«Բարձրագույն և հետբուհական մասնագիտական կրթության մասին» Հայաստանի Հանրապետության օրենքի 21-րդ հոդվածի 1-ին մասին և «Կրթության մասին» Հայաստանի Հանրապետության օրենքի 42-րդ հոդվածի 2-րդ մասին համապատասխան՝ Հայաստանի Հանրապետության կառավարությունը որոշում է.

1. Հաստատել Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը՝ համաձայն հավելվածի:

2. Ուժը կորցրած ճանաչել Հայաստանի Հանրապետության կառավարության 2000 թվականի հուլիսի 7-ի <<Հայաստանի Հանրապետությունում կրթական գործունեության լիցենզավորման, ինչպես նաև միջին և բարձրագույն մասնագիտական ուսումնական հաստատությունների ու դրանց մասնագիտությունների պետական հավատարմագրման կարգերը հաստատելու մասին>> N 372 որոշումը:

3. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

Ա. Աշոտյան

## ԿԱՐԳ

### ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ՄԱՍՆԱԳԻՏԱԿԱՆ ԿՐԹԱԿԱՆ ԾՐԱԳՐԵՐ ԻՐԱԿԱՆԱՑՆՈՂ ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆՆԵՐԻ ԵՎ ԴՐԱՆՑ ՄԱՍՆԱԳԻՏՈՒԹՅՈՒՆՆԵՐԻ ՊԵՏԱԿԱՆ ՀԱՎԱՏԱՐՄԱԳՐՄԱՆ

#### Լ.ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում է Հայաստանի Հանրապետությունում միջին և բարձրագույն մասնագիտական հիմնական կրթական ծրագրեր իրականացնող ուսումնական հաստատությունների (այսուհետ՝ Ուսումնական հաստատություն) պետական հավատարմագրման կարգը՝ անկախ դրանց գերատեսչական ենթակայությունից և կազմակերպարարական ձևից:
2. Պետական հավատարմագրումն իրականացվում է ներքոհիշյալ գործընթացներով.
  - 1) Ենթակառուցվածքային (*Ինստիտուցիոնալ*) հավատարմագրում,
  - 2) Ըստ մասնագիտության կրթական ծրագրերի հավատարմագրում (այսուհետ՝ Ծրագրային հավատարմագրում):
3. Ենթակառուցվածքային հավատարմագրումը պարբերաբար կրկնվող (շրջափուլային) պարտադիր գործընթաց է Հայաստանի Հանրապետության տարածքում գործող բոլոր Ուսումնական հաստատությունների համար:
4. Ծրագրային հավատարմագրումն իրականացվում է կամավորության սկզբունքով՝ միայն ենթակառուցվածքային հավատարմագրման դրական արդյունքի դեպքում:
5. Ուսումնական հաստատության մասնաճյուղերը ենթակառուցվածքային հավատարմագրում և Ծրագրային հավատարմագրում անցնում են ընդհանուր հիմունքներով՝ մասնաճյուղ ունեցող Ուսումնական հաստատության հայտի հիման վրա, մայր ուսումնական հաստատության կազմում: Մասնաճյուղի համար պետական հավատարմագիր տրվում է մասնաճյուղ ունեցող Ուսումնական հաստատությանը:
6. Ուսումնական հաստատությունների ենթակառուցվածքային և Ծրագրային հավատարմագրման գործընթացները կազմակերպում և իրականացնում է «Մասնագիտական կրթության որակի ապահովման ազգային կենտրոն» հիմնադրամը (այսուհետ՝ ՈԱԱԿ):

## II. ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆՆԵՐԻ ԵՆԹԱԿԱՌՈՒՑՎԱԾՔԱՅԻՆ ՀԱՎԱՏԱՐՄԱԳՐՈՒՄ

7. Ենթակառուցվածքային հավատարմագրում անցնելու համար Ուսումնական հաստատությունը պետք է՝
- 1) ներկայացնի դիմում-հայտ՝ ըստ ՈԱԱԿ-ի մշակած և հոգաբարձուների խորհրդի կողմից հաստատված համապատասխան ձևաթղթի,
  - 2) ունենա կրթական գործունեություն իրականացնելու թույլտվություն՝ լիցենզիա,
  - 3) լրացնի ՈԱԱԿ-ի էլեկտրոնային համապատասխան հարցաշարը:
8. Ենթակառուցվածքային հավատարմագրման գործընթացն իրականացվում է 3 հաջորդական փուլերով՝
- 1) *Առաջին փուլ*՝ ենթակառուցվածքային կարողությունների ներքին գնահատում Ուսումնական հաստատության կողմից՝ ըստ ՈԱԱԿ-ի սահմանած և հոգաբարձուների խորհրդի կողմից հաստատված համապատասխան ձևաչափի (այսուհետ՝ Ինքնավերլուծություն):
  - 2) *Երկրորդ փուլ*՝ Ուսումնական հաստատության Ինքնավերլուծության, կրթական և որակի ապահովման գործընթացների իրականացման արտաքին գնահատում փորձագիտական խմբի կողմից՝ օրենքով սահմանված ուսումնական հաստատության տեսակին ներկայացվող պահանջներին, մասնագիտությունների կրթական ծրագրերի պետական կրթական չափորոշիչներին և ՀՀ կառավարության սահմանած ենթակառուցվածքային հավատարմագրման չափորոշիչներին համապատասխան (այսուհետ՝ Փորձաքննություն):
  - 3) *Երրորդ փուլ*՝ Ինքնավերլուծության և փորձաքննության արդյունքների հիման վրա ՈԱԱԿ-ի Հավատարմագրման Խորհրդի, որի ձևավորման և գործունեության ընթացակարգը և կազմը հաստատվում է ՈԱԱԿ հոգաբարձուների խորհրդի կողմից, դրական կամ բացասական եզրակացության մասին որոշման կայացում:
9. Դիմում-հայտի ու ուսումնական հաստատության ինքնավերլուծության ընդունումը, փորձաքննությունը և որոշման կայացումն իրականացվում են սույն կարգի պահանջներին համաձայն:
10. Ենթակառուցվածքային հավատարմագրման արդյունքները գրանցվում են Հավատարմագրման Պետական Գրանցամատյանում:
11. ՈԱԱԿ-ի Հավատարմագրման խորհրդի կայացված որոշումն ուղարկվում է կրթության պետական կառավարման լիազորված մարմնի (այսուհետ՝ Նախարարություն) հաստատմանը: Նախարարությունն այն ստանալուց հետո 3-օրյա ժամկետում, իրականացնում է ներկայացված տվյալների ուսումնասիրություն /սույն կարգով նախատեսված պահանջների ապահովման վերաբերյալ/ և որոշում է կայացնում պետական հավատարմագրման մասին, որի հիման վրա ուսումնական հաստատությանը ենթակառուցվածքային հավատարմագրման դեպքում տրվում է պետական հավատարմագրման վկայական, որի մասին ՈԱԱԿ-ի կողմից համապատասխան գրառում է կատարվում Հավատարմագրման Պետական Գրանցամատյանում:

12. Ենթակառուցվածքային հավատարմագրումն ուժի մեջ է ոչ ավելի, քան 6 տարվա ընթացքում:
13. Բացասական որոշման դեպքում ուսումնական հաստատությունը կարող է 2 տարի հետո նորից անցնել ենթակառուցվածքային հավատարմագրում՝ սահմանված նույն ընթացակարգով:

### III. ՄԱՍՆԱԳԻՏՈՒԹՅԱՆ ԿՐԹԱԿԱՆ ԾՐԱԳՐԵՐԻ ՀԱՎԱՏԱՐՄԱԳՐՈՒՄ

14. Ծրագրային հավատարմագրում անցնելու համար ուսումնական հաստատությունը պետք է.
  - 1) Ներկայացնի դիմում-հայտ՝ ըստ ՈԱԱԿ-ի մշակած և հոգաբարձուների խորհրդի կողմից հաստատված համապատասխան ձևաթղթի,
  - 2) Ունենա կրթական գործունեություն իրականացնելու թույլտվություն՝ լիցենզիա,
  - 3) լրացնի ՈԱԱԿ-ի էլեկտրոնային համապատասխան հարցաշարը,
  - 4) ներկայացնի պետական հավատարմագրման վկայականը:
15. Ծրագրային հավատարմագրման գործընթացն իրականացվում է 3 հաջորդական փուլերով՝
  - 1) *Առաջին փուլ*՝ մասնագիտության կրթական ծրագրի, ուսումնական գործունեության ներքին գնահատում ուսումնական հաստատության կողմից՝ ինքնավերլուծություն, ըստ ՈԱԱԿ-ի մշակած և հոգաբարձուների խորհրդի կողմից հաստատված համապատասխան ձևաչափի:
  - 2) *Երկրորդ փուլ*՝ ուսումնական հաստատության ինքնավերլուծության, ուսումնական գործունեության արտաքին գնահատում փորձագիտական խմբի կողմից՝ մասնագիտությունների կրթական ծրագրերի պետական կրթական չափորոշիչներին և ՀՀ կառավարության սահմանած Ծրագրային հավատարմագրման չափորոշիչներին համապատասխան:
  - 3) *Երրորդ փուլ*՝ փուլ՝ ինքնավերլուծության և փորձաքննության արդյունքների հիման վրա ՈԱԱԿ-ի Հավատարմագրման Խորհրդի դրական կամ բացասական որոշման կայացում:
16. Դիմում-հայտի ու ուսումնական հաստատության ինքնավերլուծության ընդունումը, փորձաքննությունը և որոշման կայացումը իրականացվում են սույն կարգի պահանջներին համաձայն:
17. Ըստ մասնագիտությունների հավատարմագրված կրթական ծրագրերը գրանցվում են Հավատարմագրման Պետական Գրանցամատյանում:
18. Մասնագիտության կրթական ծրագիրը համարվում է հավատարմագրված Հավատարմագրման Պետական Գրանցամատյանում կրթական ծրագրի գրանցվելու պահից:
19. Ուսումնական հաստատությունն իրավունք ունի Ծրագրային հավատարմագրման համար դիմել Որակի ապահովման եվրոպական ռեգիստրում գրանցված կազմակերպություններին: ՈԱԱԿ-ը պետք է նախօրոք տեղեկացվի գործընթացի նախաձեռնման մասին: Ծրագրային հավատարմագրման արդյունքները գրանցվում են Հավատարմագրման Պետական Գրանցամատյանում:

20. ՈԱԱԿ-ը Ծրագրային հավատարմագրման մասին ընդունված որոշումը հրապարակում է զանգվածային լրատվության միջոցներով:
21. Ծրագրային հավատարմագրման մասին ՈԱԱԿ-ի Հավատարմագրման Խորհրդի որոշման հրապարակումից հետո՝ մեկշաբաթյա ժամկետում այն ներկայացվում է Նախարարություն՝ հաստատման: Նախարարությունը այն ստանալուց հետո 3-օրյա ժամկետում, իրականացնում է ներկայացված տվյալների ուսումնասիրություն /սույն կարգով նախատեսված պահանջների ապահովման վերաբերյալ/ և որոշում է կայացնում ծրագրային հավատարմագրման մասին, որի հիման վրա ուսումնական հաստատությանը տրվում է պետական հավատարմագրման վկայականի ներդիրներ, որի մասին ՈԱԱԿ-ի կողմից համապատասխան գրառում է կատարվում Հավատարմագրման Պետական Գրանցամատյանում:
22. Ծրագրային հավատարմագրումն ուժի մեջ է ոչ ավելի, քան 5 տարվա ընթացքում:
23. Վկայականի և նրա ներդիրի ձևաթղթերը հաստատում է Նախարարությունը: ՈԱԱԿ-ը ապահովում է վկայականի և նրա ներդիր(ներ)ի տպագրությունը, հաշվառումը և պահպանումը: Վկայականում նշվում է գրանցման համարը, տրման ամսաթիվը և գործողության ժամկետը, ուսումնական հաստատության տարատեսակը, ուսումնական հաստատության լրիվ անվանումը, հաստատության և մասնաճյուղերի գտնվելու վայրը: Վկայականի ներդիր(ներ)ում նշվում են ուսումնական հաստատության և սույն կարգով սահմանված դեպքում նաև մասնաճյուղերի եւ դրանց հավատարմագրված մասնագիտությունները՝ ըստ կրթական ծրագրերի, ներդիրի գործողության ժամկետը: Ներդիր(ներ)ը վավեր է միայն վկայականի առկայության դեպքում:
24. Ուսումնական հաստատությունը պարտավոր է ուսանողներին տեղեկացնել Ծրագրային հավատարմագրման արդյունքների մասին:
25. Ենթակառուցվածքային և Ծրագրային հավատարմագրման մասին որոշումները կարող են բողոքարկվել դատարանում՝ Հայաստանի Հանրապետության օրենսդրությամբ սահմանված կարգով:
26. Պետական հավատարմագրման վկայական տալու, ինչպես նաև այդ վկայականում փոփոխություն կատարելու դեպքում գանձվում է պետական տուրք՝ «Պետական տուրքի մասին» Հայաստանի Հանրապետության օրենքով սահմանված կարգով և չափերով:
27. Պետական հավատարմագրման վկայականը չի թույլատրվում օտարել, գրավ դնել կամ փոխանցել մեկ այլ անձի:

IV. ԴԻՄՈՒՄ-ՀԱՅՏԻ և ԻՆՔՆԱՎԵՐԼՈՒԾՈՒԹՅԱՆ ԸՆԴՈՒՆՄԱՆ,  
ՓՈՐՁԱՔՆՆՈՒԹՅԱՆ ԱՆՑԿԱՑՄԱՆ և ՈՐՈՇՄԱՆ ԿԱՅԱՑՄԱՆ ԸՆԹԱՑԱԿԱՐԳ

28. Դիմում-հայտերը կարող են ներկայացվել ՈԱԱԿ ամբողջ տարվա ընթացքում:
29. ՈԱԱԿ-ը դիմում-հայտն ընդունելու կամ մերժելու հարցը քննարկում և այդ մասին դիմողին գրավոր ծանուցում է ոչ ուշ, քան դիմումը ստանալուց մեկ ամսվա ընթացքում: ՈԱԱԿ-ը մերժում է դիմում-հայտը, եթե՝
  - 1) Ուսումնական հաստատությունը չունի կրթական գործունեություն իրականացնելու թույլտվություն՝ լիցենզիա,

- 2) ներկայացված փաստաթղթերի փաթեթը թերի է և պարունակում են ոչ հավաստի տեղեկություններ,
- 3) ուսումնական հաստատության գործունեությունը կասեցված է:

30. ՈԱԱԿ-ը ենթակառուցվածքային կամ Ծրագրային հավատարմագրման գործընթացներն իրականացնում է դիմում-հայտն ընդունելուց հետո 1 տարվա ընթացքում:
31. Դիմում-հայտի ընդունումից հետո 1 շաբաթվա ընթացքում դիմողի և ՈԱԱԿ-ի միջև՝ ՀՀ օրենսդրությամբ սահմանված կարգով, կնքվում է ծառայությունների վճարովի մատուցման պայմանագիր: Պայմանագրում հստակ նշվում են գործընթացի մեկնարկի ամսաթիվը և ժամանակացույցը:
32. Գործընթացի մեկնարկից հետո, 10 շաբաթվա ընթացքում, ուսումնական հաստատությունը պարտավոր է ՈԱԱԿ ներկայացնել ինքնավերլուծություն:
33. Ինքնավերլուծությունը ներկայացվում է հայերեն և անգլերեն լեզուներով, ինչպես նաև էլեկտրոնային տարբերակով:
34. Ինքնավերլուծության հայերեն և անգլերեն տեքստերի միջև հակասությունների դեպքում հիմք է ընդունվում հայերեն տեքստը:
35. Ինքնավերլուծությանը կից ներկայացվում է ձևաչափով պահանջվող հիմնավորող փաստաթղթերի փաթեթը:
36. Ինքնավերլուծությունը ստանալուց հետո 4 շաբաթվա ընթացքում ՈԱԱԿ-ը որոշում է կայացնում Ինքնավերլուծությունն ընդունելու կամ վերադարձնելու մասին:
37. ՈԱԱԿ-ը Ինքնավերլուծությունը վերադարձնում է, եթե՝
  - 1) այն չի համապատասխանում ՈԱԱԿ-ի մշակած միասնական ձևաչափին,
  - 2) առկա են բովանդակային, տեխնիկական, կառուցվածքային կամ այլ թերություններ,
  - 3) ինքնավերլուծության մեջ արտացոլված տվյալներն ոչ հավաստի են:
38. Նշված թերությունները վերացնելու համար ՈԱԱԿ-ը սահմանում է մեկամսյա ժամկետ:
39. Ինքնավերլուծությունում առկա թերությունները սահմանված ժամկետում վերացնելու և կրկին ներկայացնելու դեպքում ՈԱԱԿ-ը կարող է նոր որոշում կայացնել Ինքնավերլուծությունն ընդունելու կամ մերժելու մասին:
40. Ինքնավերլուծությունը ընդունելու մասին որոշումը կայացնելու պահից երկշաբաթյա ժամկետում ՈԱԱԿ-ը ուսումնական հաստատությանը գրավոր ներկայացնում է Փորձագիտական խմբի կազմը: Փորձագիտական խմբի ձևավորման կարգը հաստատվում է ՈԱԱԿ հոգաբարձուների խորհրդի կողմից:
41. 2 շաբաթվա ընթացքում ՈԱԱԿ-ը Ուսումնական հաստատության հետ համաձայնեցնում է Փորձագիտական խմբի կազմը:
42. Փորձագիտական խմբի կազմի վերաբերյալ համաձայնության չգալու դեպքում ուսումնական հաստատության հետ կնքված պայմանագիրը լուծվում է:
43. Փորձագետների խմբի վերջնական կազմը հաստատվում է ՈԱԱԿ-ի տնօրենի հրամանով: Փորձագետների հետ կնքվում են վճարովի ծառայությունների մատուցման պայմանագրեր:

44. ՈԱԱԿ-ի կողմից Փորձագիտական խմբի կազմը հաստատելու օրվանից 8 շաբաթվա ընթացքում Փորձագիտական խումբն այց է կատարում Ուսումնական հաստատություն (այսուհետ՝ Փորձագիտական այց):
45. Փորձագիտական այցի ժամանակացույցը, պայմանները, ընթացակարգը և տևողությունը սահմանվում են Ուսումնական հաստատության և ՈԱԱԿ-ի փոխադարձ համաձայնությամբ:
46. Փորձագիտական այցը կարող է տևել 2-5 օր:
47. Փորձագիտական այցից հետո անհրաժեշտության դեպքում ՈԱԱԿ-ը իրավունք ունի պահանջել լրացուցիչ փաստաթղթեր:
48. Փորձագիտական այցի ավարտից հետո երկշաբաթյա ժամկետում փորձագիտական խումբը պատրաստում և ՈԱԱԿ է ներկայացնում փորձագիտական զեկույցի նախնական տարբերակը:
49. ՈԱԱԿ-ը փորձագիտական զեկույցի նախնական տարբերակը ստանալու օրվանից երկու շաբաթվա ընթացքում այն ուղարկում է Ուսումնական հաստատություն:
50. Ուսումնական հաստատությունը կարող է զեկույցի նախնական տարբերակի վերաբերյալ իր դիտողություններն ու առարկությունները երկշաբաթյա ժամկետում ներկայացնել ՈԱԱԿ: Առարկություններ ու դիտողություններ չունենալու դեպքում հավաստում է զեկույցի նախնական տարբերակի վերաբերյալ իր համաձայնությունը:
51. Փորձագիտական այցի ավարտից հետո 6 շաբաթվա ընթացքում Փորձագետների խումբը վերջնական զեկույցը ներկայացնում է ՈԱԱԿ:
52. Հիմք ընդունելով Ուսումնական հաստատության Ինքնավերլուծությունը, փորձագետների զեկույցը և Ուսումնական հաստատության հավաստիացումը, ՈԱԱԿ-ը կազմում է վերջնական եզրակացության նախագիծը և ներկայացնում Հավատարմագրման Խորհրդին որոշում կայացնելու համար:
53. Հավատարմագրման եզրակացության օրինակելի ձևը սահմանում է ՈԱԱԿ-ը:
54. Փորձագիտական այցի ավարտից հետո 8 շաբաթվա ընթացքում ՈԱԱԿ-ը պաշտոնական համացանցային կայքէջում հրապարակում է Ուսումնական հաստատության ենթակառուցվածքային և Ծրագրային հավատարմագրման արդյունքների մասին եզրակացությունները և Հավատարմագրման Խորհրդի որոշումները:

#### Վ. ԵԶՐԱՓԱԿԻՉ ԴՐՈՒՅԹՆԵՐ

55. Ենթակառուցվածքային հավատարմագրման եզրակացության և Ծրագրային հավատարմագրման ժամկետի ավարտից առնվազն մեկ տարի առաջ Ուսումնական հաստատությունը կարող է դիմել Ենթակառուցվածքային հավատարմագրման և Ծրագրային հավատարմագրման նոր գործընթացներ սկսելու համար:
56. Ենթակառուցվածքային և Ծրագրային հավատարմագրման գործընթացների իրականացման համար նախատեսված փորձաքննության, գործուղման և այլ ծախսերը, անկախ գործընթացի արդյունքից, պայմանագրային կարգով հատուցում է Ուսումնական հաստատությունը՝ ՈԱԱԿ հոգաբարձուների խորհրդի կողմից հաստատված և ՈԱԱԿ-ի

կողմից հրապարակված սակագների համաձայն: Ծախսերի համար նախատեսվող գումարը Ուսումնական հաստատությունները պետք է փոխանցեն ՈԱԱԿ-ի հաշվարկային հաշվին:

57. Պետական հավատարմագրումը ուժը կորցրած է ճանաչվում, եթե՝
- 1) հավատարմագրի վավերականության ժամկետը լրացել է,
  - 2) ՀՀ օրենսդրությամբ սահմանված կարգով դադարեցվել է Ուսումնական հաստատության գործունեությունը,
  - 3) լիցենզիան ուժը կորցրած է ճանաչվել:
58. ՈԱԱԿ-ը պետական հավատարմագրումն ուժը կորցրած ճանաչելու մասին որոշումը հրապարակում է և կատարում համապատասխան գրառում Հավատարմագրման Պետական Գրանցամատյանում:
59. Ուսումնական հաստատությունն Ենթակառուցվածքային հավատարմագրումն ուժը կորցրած ճանաչելու մասին որոշումը ստանալուց հետո 10-օրյա ժամկետում պարտավոր է իր ստացած պետական հավատարմագրման վկայականը վերադարձնել Նախարարություն:
60. Պետական հավատարմագրումն ուժը կորցրած ճանաչելու մասին որոշումը կարող է բողոքարկվել դատարանում՝ ՀՀ օրենսդրությամբ սահմանված կարգով:
61. Ուսումնական հաստատությունը պետական հավատարմագրման վկայականը կորցնելու դեպքում դիմում է Նախարարություն, որը 15-օրյա ժամկետում տալիս է <<Կրկնօրինակ>> նշագրմամբ պետական հավատարմագրման նոր վկայական, որի համար գանձվում է պետական տուրք՝ <<Պետական տուրքի մասին>> ՀՀ օրենքով սահմանված կարգով և չափերով:
62. Սույն կարգի բաղկացուցիչ մասն են համարվում.
- 1) Ենթակառուցվածքային և Ծրագրային հավատարմագրման ինքնավերլուծության ձևաչափերը,
  - 2) Փորձաքննության անցկացման ձեռնարկը:

«Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին»  
 ՀՀ կառավարության որոշման նախագծի վերաբերյալ հիմնավորում

Իրավական ակտի հիմնավորումը	
1.	<b>Անհրաժեշտություն</b>
	Նախագիծն ընդունվում է «Կրթության մասին» Հայաստանի Հանրապետության օրենքի 42-րդ հոդվածի 2-րդ մասին, «Բարձրագույն և հետբուհական մասնագիտական կրթության մասին» Հայաստանի Հանրապետության օրենքի 5-րդ հոդվածի 1-ին մասի 5-րդ կետին և 21-րդ հոդվածի 1-ին մասի 3-րդ կետին համապատասխան:
2.	<b>Ընթացիկ իրավիճակը և խնդիրները</b>
	Միջին և բարձրագույն մասնագիտական ուսումնական հաստատությունների և հետբուհական կրթություն իրականացնող կազմակերպությունների պետական հավատարմագրման գործընթացը դադարեցված է 2005 թվականից, քանի որ բարեփոխումների արդյունքում մասնագիտական կրթության համակարգը ենթարկվել է կառուցվածքային և բովանդակային արմատական փոփոխությունների, անցում է կատարվել եռաստիճան կրթական համակարգին:
3.	<b>Տվյալ բնագավառում իրականացվող քաղաքականությունը</b>
	Բարեփոխումների համատեքստում իրականացվող քաղաքականության նպատակը որակի ապահովման երաշխիքների նոր գործիքակազմի բարելավումն է, նոր, միատեսակ ուղենիշների և չափանիշների կիրառումը պետական և ոչ պետական բուհերի նկատմամբ:
4.	<b>Կարգավորման նպատակը և բնույթը</b>
	Հայաստանի Հանրապետության միջին, բարձրագույն և հետբուհական մասնագիտական կրթության համակարգում ուսուցման որակի ներքին (ներբուհական) ու արտաքին գնահատման և հավատարմագրման միջազգային (եվրոպական) չափանիշների ներդրումը:
5.	<b>Նախագծի մշակման գործընթացում ներգրավված ինստիտուտներն ու անձինք</b>
	ՀՀ կրթության և գիտության նախարարություն <<Մասնագիտական կրթության որակի ապահովման ազգային կենտրոն>> հիմնադրամ ՀՀ բարձրագույն ուսումնական հաստատություններ ՀՀ միջին մասնագիտական ուսումնական հաստատություններ
6.	<b>Ակնկալվող արդյունքը</b>
	Միջին և բարձրագույն մասնագիտական ուսումնական հաստատությունների և հետբուհական կրթություն իրականացնող կազմակերպությունների պետական հավատարմագրման կարգի հաստատումը:

### **Տեղեկանք**

«Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի ընդունման կապակցությամբ այլ իրավական ակտերի ընդունման անհրաժեշտության մասին

Ներկայացվող «Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի ընդունման առնչությամբ այլ օրենքների և իրավական ակտերի ընդունման անհրաժեշտություն չի առաջանում:

### **Տեղեկանք**

«Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի ընդունման կապակցությամբ ՀՀ պետական բյուջեի ծախսերի կամ եկամուտների ավելացման կամ նվազեցման մասին

Ներկայացվող «Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի ընդունումը ՀՀ պետական կամ տեղական բյուջեում եկամուտների կամ ծախսերի ավելացում կամ նվազեցում չի նախատեսում:

## Տեղեկանք

«Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի քննարկմանը հասարակության մասնակցության վերաբերյալ

Տեղեկանք հասարակության մասնակցության մասին	
1.	Հասարակությանը նախագծի վերաբերյալ իրազեկումը
	Նախագծի մշակման վերաբերյալ տեղեկատվությունը տեղադրվել է ՀՀ կրթության և գիտության նախարարության կայքում՝ <a href="http://www.edu.am">www.edu.am</a> , նախագծին կարող էին ծանոթանալ և դրա վերաբերյալ կարծիք հայտնել այցելելով <a href="http://www.armedu.am">www.armedu.am</a> կայք և գրանցվելով <<Հայկական կրթական միջավայր>> ֆորումում:
2.	Հասարակության մասնակցությունը նախագծմանը և/ կամ քննարկումներին
	Մինչև ս.թ. հունիսի 27-ը նախագծի վերաբերյալ որևէ արձագանք չի եղել:

## Տեղեկանք

«Հայաստանի Հանրապետությունում մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգը հաստատելու և Հայաստանի Հանրապետության կառավարության 2000 թվականի հուլիսի 7-ի N 372 որոշումը ուժը կորցրած ճանաչելու մասին» ՀՀ կառավարության որոշման նախագծի վերաբերյալ ստացված դիտողությունների և առաջարկությունների, դրանց ընդունման կամ չընդունման վերաբերյալ

Առարկության, առաջարկության հեղինակը, գրության ստացման ամսաթիվը, գրության համարը	Առարկության, առաջարկության բովանդակությունը	Եզրակացություն	Կատարված փոփոխությունները
ՀՀ առողջապահության նախարարություն նախարարություն	Առաջարկություն և դիտողություն չունեն:		
ՀՀ ֆինանսների նախարարություն	Առաջարկություն և դիտողություն չունեն:		
ՀՀ արտակարգ իրավիճակների նախարարություն	Առաջարկություն և դիտողություն չունեն:		
ՀՀ էկոնոմիկայի նախարարություն	Առաջարկություն և դիտողություն չունեն:		
ՀՀ արդարադատության նախարարություն	ՀՀ ԿԳ նախարարության 07.06.2011թ.-ի հմ. 06.2/5995-11 գրությամբ ուղարկվել է ՀՀ արդարադատության նախարարություն և դեռևս կարծիք չի ստացվել:		